

Gvangjsih Minzcuz Bau

广西民族报 ganhhau: CN45-0036 B.2020 Nd.11 Ng.4 liggaueq gengcej nienz ndwengouj cibgouj

Baihguenjbanh: Gvangjsih
Bouxcuengh Swcigih Minz-
cuz Cunghgyau Swvu Veij-
yenzvei
Biengauj okbanj: Gvangjsih
Minzcuz Bause
Geizsoq: Gungh daih 3447 geiz
Geiz neix 8 banj

Aenhoih Cunghgung Daihcibgouj Gaiq Haj Cung Cienzhoih Youq Baekging Hai

10 nyied 26 daengz 29 hauh, aenhoih Cunghgoz Gungcanjdangj Daihcibgouj Gaiq Cunghyangh Veijyenzvei Daihhaj Baez Daengxcungq Veiyi youq Baekging hai. Cunghyangh Veijyenzvei cungjsuhgi Siz Ginbingz gangj gij vah youqgaenj. Daengxcungq vunz hai aenhoih neix caez dingq caeuq doxyaeng gij baugau youz Cunghyangh Cwngci Giz hawj Siz Ginbingz guh de. Cunghyangh Cwngci Giz guhdaeuz ndabaiz baez hoih neix.

Daengxcungq vunz hai aenhoih neix haeujsim saemjlnh caemhcaiq doenggvaq le 《Aen Genyi Cunghgung Cunghyangh Dingh Gij Vehsuenq

Daihcibsei q Aen Haj Bi Caeuq Gij Vehsuenq Gyae Daengz Bi 2035 Gvendaengz Hwngfat Gozminz Ginghci Caeuq Aenbiengz》.

Daengxcungq vunz hai aenhoih neix hemqheuh, daengx aendangj daengx guk gak cuz lwgminz yaek doxgiet maenhdaet youq senqhenz aen dangjcunghyangh aeu Siz Ginbingz guh cehsim de, caezhoz caemhsim, haenqrengz buekguh, dwkhingz ciengz ciengq hwnqguh aen guk sevei cujyi yienghyienh cungj guhdaengz yendaiva caez bae.

Daengxcungq vunz hai aenhoih neix caemh baenzneix nyinhnaeuz, bungzdaengz seiqgyaiq gak guk dox-

gvanhaeh baenzneix lai baenzde luenh, gaiqrap gaijgwz hwngfat onjdingh ndaw guk youh naek youh hoj dawz daegbied deng binghra q bwtndat cungdongj haenq lailai, aen dangjcunghyangh aeu Siz Ginbingz guh cehsim de mbouj lumz goeknduj, dawz maenh gaiqrap, doxgiet daiqlingx daengx aendangj daengx guk gak cuz lwgminz gwn haemz gwn hoj caemh yamq baenaj, guh hong moq baenz saeh moq, buekrengz baenzsaeh doinyoengx gak yiengh hongsaeh aendangj caeuq gukgya baenaj, dingj hingz gak yiengh fungyiemj caeuq hojnanz, aenruz yiengh sevei cujyi miz daegsaek Cungguk de

laebdaeb ndaej rumz nyoengx langh veq cungj bonghfofo, mbouj lau gijmaz sohsob baenaj. Yawj gij saeh gvaqbae raeuz caiq ndaej raen, miz Siz Ginbingz dungzci guh cehsim dangjcunghyangh, daengx aendangj, gaem dox hai ruz, miz daengx aendangj daengx guk gak cuz lwgminz doxgiet caemhsim, haenqrengz buekguh, youq gwnz roen baenaj raeuz itdingh dingj hingz gak cungj hojnanz, youq seizdaih moq raeuz itdingh lai miz rengz doinyoengx gij hongsaeh yiengh sevei cujyi miz daegsaek Cungguk de baenaj.

(Sinhvazse)

Yungzsuij: Cienz Gij Cingsaenz “Haj Cung Cienzhoih” Haeuj Mbanjyauz



10 nyied 31 hauh, Yungzsuij Myauzcuz Swciyen Gijveij Genhvej gyoebbaenz aendoih senhconz iq, bae daengz ndaw yienh Dungzlen Yauzcuz Yangh, fat swhliu, dangciengz gangj, aeu banjbau langhbaiz daengj, baenzneix guh lwnh vunzlai rox Cunghgoz Gungcanjdangj Daihcibgouj Gaiq Cunghyangh Veijyenzvei Daihhaj Baez Daengxcungq Veiyi ok maz cwngcwz moq, yienghsiengq moq, hongbaenz moq caeuq gij vehsuenq “cibsei q haj” caeuq gij vehsuenq gyae daengz bi 2035, vunzlai maij dingq gyaez aeu rox. Ndaw doz dwg boux giigenj genhcaz ganbu Liengz Yin’ gvei lwnh gij cingsaenz “Haj Cung Cienzhoih” hawj gyoengq beixnuengx Yauzcuz rox.

(Lungz Linzci)

SIUSIK DINJ

● Bineix 9 ndwen gonq, gih raeuz ndaej yungh 8.3 ik Meijyenz cienzrogguk, beij bi’ gvaq caemh duenh gyalai 10.67%, lienzdaemh 17 ndwen cungj gyalai.

(Cauh Hungzmeiz)

● Ciuq gyoepsuenq, daj bi 2016 doxdaeuj, Ningzmingz Yen guh 18 aen hanghmoeg hwnqguh roen doeng mbanj, guhbaenz 254.21 goengleix roen, gungh roengz 21068 fanh maenz; guh 614 aen hanghmoeg hwnqguh roen doeng mbanj, guhbaenz 1172.54 goengleix roen, gungh roengz 36454.99 fanh maenz, gaij gij roen lajmbanj lai ndei doxdoeng.

(Luz Dezsanh)

● 10 nyied 27 hauh, aen yizsiz soengq cienz banghag Cwngzsinh de youq Fangzcwnzganganj Si Fangzcwngz Gih Daihsei q Siujhag gawjbanh. Aen hagdangz neix miz 10 boux hagseng ranzgungzhoj youh doegsaw ndaej ndei de boux ndaej 3000 maenz cienz banghag.

(Vanz Siengz)

● 10 nyied 31 hauh banhaet, Bingzgoj Si youq Vwnzva Gunghyenz guh baenzroix hozdung ngoenz senhconz son’ gyauq cau hguh aen si yienghndei daengx guk minzcuz doxgiet baenaj, gungh miz 1000 lai boux daiyauj gak danhvei ndaw si, hagseng, ginzchung daengj daeuj camgya.

(Lij Gyanghlanz)

Gvangjsih Sawcuengh Yozyau Banh Aenban Seizhoengq Sonlien Sawcuengh

10 nyied 27 hauh, aen yizsiz hai aenban Gvangjsih Sawcuengh Yozyau seizhoengq sonlien Sawcuengh de youq aen hagdangz neix guh. Ndaw hagdangz neix miz 6 aen ciennieb baudaengz minzcuz yinhyoz caeuq diuqfoux, son’ gyauq lwgnyez caengz haeujhag, fugsah caeuq guenjeleix lijyouz daengj gungh 70

lai boux lauxsae caeuq hagseng vanzlij vunz rog hagdangz guhdoh daeuj hag.

Baez sonlien neix aeu 《Sawcuengh Giekdae j》(Swcigih Minzyijveij bien) guh sawson, ndawde miz singyaem Vahcuengh, sawloih Vahcuengh, gij cihsiz lizsij vwnzva Bouxcuengh, gij vwnzva yisuz Boux-

cuengh daengj. Baez sonlien neix miz lauxsae dangciengz son, lauxsae hagseng gag hag gag doxgyau doxyaeng daengj. Aen ban neix daj 10 nyied 27 hauh daengz 12 nyied 27 hauh cungj hai, it cou singgeiz ngeih lajbyonghngoenz roxnaeuz banhaemh hwnjdangz (cou hwnj song dangz).

(Liz Houhan Banh Lezyingh)